



Publicaziuns dalla vischnaunca, jamna 49

Damondas da baghegiar

2022-1066.000

Datum dalla publicaziun: 9 da december 2022

Il patrun: Sunrise Communications AG, Thurgauerstrasse 101B, 8152 Glattpark (Opfikon)
Il representant: cablex AG, Freilagerstrasse 40, 8047 Zürich
Intenziun: Spazzar e construcziun nova digl indrez e l'antenna per la communicaziun dallasdatasmobilas (5G)
indrez: GR586-1, GR_3033B, MOME
Edifici nr. GR586-1, GR_3033B, MOME
Parcella: 2401
Adressa: Scandialas, Via Stagias 10.1, 7183 Mumpé Medel
Zona: – Zona agricola
– Zona per la protecziun dalla cuntrada
Zona da prighel: Negina

2022-1071.000

Datum dalla publicaziun: 9 da december 2022

Il patrun: Robert Castelberg, Buelstrasse 22, 5426 Lengnau AG
Il representant: Robert Castelberg, Buelstrasse 22, 5426 Lengnau AG
Intenziun: Midada d'intent dretg funsil
Edifici nr. 632C/632B
Parcella: 3561
Adressa: Via Runca 26, 7182 Caischavedra
Zona: Zona agricola
Zona da prighel: Negina

Protestas:

Ils plans da construcziun ein deponi tier l'administraziun communal. L'investa publica cuoza 20 dis dapi il datum dalla publicaziun. Eventualas protestas encunter sura damondas da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant.

Disentis/Mustér, ils 9 da december 2022

Uffeci da baghegiar Disentis/Mustér



Lubientschas da baghegiar

L'istanza da baghegiar ha concediu suandontas lubientschas da baghegiar:

Nr. 2022-1052.000

Bruno e Karin Schmed-Geissbühler, Schulstrasse 5, 8630 Rüti; construcziun nova da duas casas da pliras famiglias cun garascha sutterrana e furar sondas geotermicas, parcella 1713, Via Alpettas 12/14, 7180 Disentis/Mustér.

Nr. 2022-1063.000

Phan & Co AG, Frohburgstrasse 67, 8006 Turitg; midada d'intent, scumiada dalla habitaziun primara nr. 5 cun la habitaziun senza restricziun nr. 1, parcella 600, Via Run 1, 7180 Disentis/Mustér.

Nr. 2022-1065.000

Martin Venzin-Manetsch, Via Pintga 8, 7180 Disentis/Mustér; remplazzament dil scaldament, nova pompa da calira cun aria, parcella 814, Via Pintga 8, 7180 Disentis/Mustér.

Nr. 2022-1067.000

Marc e Sabrina Deplazes-Maissen, Via Plaun-Sut 3, 7180 Disentis/Mustér; construcziun nova d'ina casa d'ina famiglia, parcella 3020, Via Craiers 7, 7180 Disentis/Mustér.

Disentis/Mustér, ils 9 da december 2022

Uffeci da baghegiar Disentis/Mustér

Cussegl da vischnaunca

Il cussegl da vischnaunca seraduna **venderdis, ils 9 da december 2022**, allas 18.00 en halla Cons.

Tractandas:

1. Protocol 18-2021/2024
2. Lescha pil manteniment dallas ovras da meglieraziun e d'uaul: Secunda lecziun (messadi 27-2021/2024)
3. Cumissiun davart il provediment medicinal e d'urgenza: Nominaziun da dus cusseglier/-as (messadi 29 2021/2024)
4. Agenda 2023 (messadi 30-2021/2024)
5. Ura da damondas (conform ad art. 44 dil regulativ da fatschentas)
6. Elecziuns:
 - 6.1 dil president ni dalla presidenta dil cussegl da vischnaunca per 2023
 - 6.2 dil vicepresidente ni dalla vicepresidente dil cussegl da vischnaunca per 2023 Il president dil cussegl da vischnaunca



Temps d'unviern

Restricziuns da carrar e mesiras da segirtad Vias forestalas e funsilas

Duront igl unviern eis ei scumandau da carrar cun tuts vehichels sin las vias forestalas e funsilas. Quei scamond vala mintgamai naven digl 1. da december entochen la fin da mars, respectivamein naven dil mument che las vias ein cuvretgas cun neiv. Fullar via (rumir vias) ei scumandau (art. 10 dil reglament da traffic).

Sendas da viandar d'unviern e sendas da gianellas

Las sendas da viandar d'unviern sco era las sendas da gianellas (marcadas rosa) vegnan pridas en funcziun e mantenidas naven **digl 1. da december 2022 entochen miez d'avrel 2023**. Il bandunar sendas da viandar d'unviern e rutas da gianellas signalisadas, ni vias rumidas da neiv e tut semover ordeifer la zona da baghegiar succeda sin atgna responsabladad. Serradas da sendas, rutas e vias ein ligiontas per tuts e ston vegnir observadas (art. 6 e 10 dalla lescha davart l'organisaziun en cass da crisa).

Naven dall'entschatta december vegn il stan actual davart l'avertura da sendas da viandar d'unviern e sen sendas da gianellas communicaus silla pagina d'internet www.disentis.ch/strassen.

Nus supplichein da prender enconuschientscha da questas directivas e giavischein in bi temps d'unviern.

Bien engraziament per la capientscha ed observaziun.

Disentis/Mustér, ils 25 da november 2022

Direcziun communal Disentis/Mustér

Radunonza vischinadi Segnas e Mompé Tujetsch

Mardis, ils 13 da december 2022, casa da scola Segnas allas 20.15

Tractandas usitadas:

- Presentaziun dil concept da molocs
- Presentaziun dil project «La Ravera» Reconstrucziun dil plaz

Cordialmein envida La suprastonza

Suprastonza communal



Clom da quens

Il quen communal vegn serraus giu cun **ils 31 da december 2022**. Per saver risguardar las expensas occurridas uonn el quen 2022 ei tut tgi che ha aunc da dar quen alla vischnaunca pigl onn current supplicaus da far quei entochen il pli tard **ils 16 december 2022**. Nus supplichein tuttas firmas sco era tut ils officials dalla vischnaunca d'observar quei termin.

Administraziun communal.

Corporaziun manteniment da vias Mompé Medel

Invitaziun

Radunonza generala dalla corporaziun manteniment da vias, **mesjamna, ils 14 da december 2022** allas 20.15 el local dall'Uniun da scursalar Mompé-Medel.

Tractandas:

1. Elecziun d'in dumbravuschs
2. Protocol
3. Rapport dil president
4. Rendaquen 2019, 2020 e 2021
5. Rapport dils revisurs ed approbaziun dil quen
6. Elecziun
 - Revisurs da quen
 - Cassier
 - President
 - Actuar
 - Assessur
7. Lavur cumina
8. Informaziun pertuccont la nova Lescha pil manteniment dallas ovras da meglieraziun e d'uaul
9. Manteniment via Ragisch
10. Varia

Cordialmein envida

Per la suprastonza il president Placi Manetsch

Oz en biblioteca!

Kino da cudischs da maletgs cun Mats, la miur

Has ti plascher da vegnir en biblioteca e tedlar marvegliusas historias ord cudischs da maletgs? Mintga secund venderdis dil meins allas 14.30 legin nus avon e mussein vid ina gronda preit ils maletgs ord in cudisch da maletgs. L'occurrenza cuoza ca. in'ura ed ei adattada per tut ils affons che san gia tedlar tier bein. Naturalmein astgas ti era prender cun tei tia mumma ni in'otra persuna.

Nus selegrein zun fetg sin tei!

Cun ils pli cars salids

Mats, la miur ed il team dalla Biblioteca populara Disentis/Mustér e contuorn



Sontgaclau viseta ils seniors

Dumengia, ils 11 da december 2022, dallas 13.30 entochen allas 15.30 en halla Cons. Cun grond plascher envidein nus convischinas e convischins da 60 onns ensi alla tradiziunala sentupada cun Sontgaclau. Cun in pign program, la viseta dil Sontgaclau e tier caffè, te, vin cauld e pettas lein nus porscher a Vus in pèr emperneivlas uras en buna cumpignia. Nus selegrein da passentar ensemen cun Vus in bi suentermiezdi.

Uniun da dunnas Mustér

Invitaziun Seniors-Ca

Gievgia, ils 15 da december 2022, allas 13.45 ella Puntreis

Tema: Nus cantein - tedlein - meditein canzuns enconuschentas d'Advent tochen Nadal cun accumpignament da Jacinta alla gitarra e patratgs da Linus. Lein selegrar d'ina ura communabla egl Advent!

Cordial beinvegni!

Team Seniors-Ca

Meisa da miezdi organisada da Seniors-Ca e Puntreis

Entschatta: allas 12.15 ella Puntreis

Gentar cun treis tratgas inclusiv aua dalla spina ed 1 caffè. Annunzia entochen allas 9.00 dil di alla Puntreis (tel. 081 929 56 56).

La meisa da miezdi ei aviarta per mintgin/a.

Post d'informaziun Seniors-Ca

Biblioteca populara Disentis/Mustér e contuorn

Muort in'occurrenza interna resta la **biblioteca serrada venderdis, ils 16 da december 2022**. Nus engraziein per vossa capientscha. Bugen essan nus puspei cheu per vus gliendisdis, ils 19 da december 2022.

Il team dalla biblioteca

Societad da Musica Mustér

Concert da Nadal

Sonda, ils 17 da december 2022 allas 20.00 en baselgia s. Gions a Mustér.

Entrada libra, collecta.
